

KERATAN AKHBAR

TARIKH : 21 MEI 2024
AKHBAR : SINAR HARIAN
MUKA SURAT : 13

Ke arah mewujudkan ECER yang dinamik

Penganjuran Sidang Kemuncak SDG berjaya pupuk kesedaran rakyat mengenai projek-projek yang dilaksanakan

Oleh NURFARDLINA IZZATI MOKTAR
KUALA NERUS

Sidang Kemuncak Matlamat Pembangunan Mampan (SDG) Malaysia 2024 Wilayah Timur berjaya memupuk kesedaran rakyat di Wilayah Ekonomi Pantai Timur (ECER) mengenai kepentingan projek-projek yang selari dengan matlamat SDG.

Ketua Pegawai Eksekutif Majlis Pembangunan Wilayah Ekonomi Pantai Timur (ECERDC), Datuk Baidzawi Che Mat berkata, penganjuran sidang kemuncak itu juga membuktikan komitmen dan pendirian ECERDC dalam menjadikan Pantai Timur sebuah wilayah yang dinamik serta berdaya saing bagi merealisasikan matlamat SDG.

Beliau berkata, setiap projek dan program ECERDC yang dibuat sebelum ini sentiasa mengutamakan aspek kelestarian, perlindungan alam sekitar serta pemeliharaan seni, budaya dan warisan.

"Bagi merealisasikannya, peranan kerajaan negeri dan Pihak Berkuasa Tempatan (PBT) amatlah penting dalam

Ke arah mewujudkan ECER yang dinamik

melaksanakan projek dan inisiatif SDG di peringkat komuniti tempatan.

"Selain itu, ahli akademik juga perlu memainkan peranan menerapkan pendidikan pembangunan mampan dalam kalangan warga universiti dan masyarakat bagi memastikan tidak ada rakyat yang tertinggal bagi membangunkan masa depan yang mampan, inklusif dan adil untuk semua rakyat Malaysia," katanya.

Beliau berkata demikian ketika berucap pada Majlis Perasmian Penutupan Sidang Kemuncak SDG Malaysia 2024 Wilayah Timur di Universiti Sultan Zainal Abidin (UniSZA) di sini pada Ahad.

Timbalan Ketua Setiausaha (Makro) Kementerian Ekonomi, Datuk Luqman Ahmad dalam ucapannya berkata, adalah penting bagi semua, terutamanya generasi muda untuk memahami dan mengambil perhatian terhadap kesemua 17 matlamat SDG kerana setiap SDG tersebut adalah berkait rapat antara satu sama lain dan perlu dicapai secara kolektif untuk manfaat generasi akan datang.

"Pelaksanaan SDG akan membawa impak positif terhadap sektor ekonomi dengan memberi tumpuan kepada pembangunan infrastruktur, peningkatan akses kepada pendidikan dan latihan kemahiran,



Baidzawi (dua dari kiri), Luqman (lima dari kiri) bersama Setiausaha Kerajaan Negeri Terengganu, Datuk Seri Tengku Farok Hussin Tengku Abdul Jalil (empat dari kiri) pada Majlis Perasmian Penutupan Sidang Kemuncak SDG Malaysia 2024 Wilayah Timur di UniSZA, di Kuala Nerus pada Ahad.

serta pembangunan industri yang mampan," kata beliau.

Mengulas lanjut, Baidzawi menyatakan antara perkara yang dikupas oleh panel-panel sepanjang sidang kemuncak itu bertangsong adalah kepentingan memastikan aspek warisan dan kebudayaan tempatan selain pemuliharaan alam semula jadi dalam setiap projek pembangunan di Wilayah ECER.

Sidang kemuncak yang diadakan di

UniSZA pada Ahad menarik lebih daripada 500 peserta dengan lima ucapan serta bengkel oleh *Youth Environmental Living Lab* (YELL), sebuah program oleh Program Pembangunan Pertubuhan Bangsa-Bangsa Bersatu (UNDP) dan Tabung Kanak-Kanak Pertubuhan Bangsa-Bangsa Bersatu (UNICEF) dengan kerjasama Amanah Lestari Alam (ALAM) dan Kesatuan Eropah (EU).